

ePetrol lancar pembayaran elektronik guna MyKad

Bantuan disalurkan bagi keluarga dipilih berbelanja guna kad debit

Oleh Ahmad Fiesal Othman
fosal@bharian.com.my

EPETROL Holding Sdn Bhd (ePetrol) melancarkan sistem pembayaran elektronik menggunakan MyKad bagi penyaluran bantuan kepada golongan yang memerlukan menerusi program kebajikan MyKasih.

Ketua Eksekutifnya, Ngau Boon Keat, berkata menerusi sistem pembayaran elektronik itu, golongan memerlukan menerusi program MyKasih boleh berbelanja untuk barangan runcit menggunakan MyKad di rangkaian kedai runcit dipilih.

Beliau berkata, ia adalah kali pertama MyKad digunakan untuk menyalurkan bantuan kebajikan dan sistem itu diasaskan daripada penyelesaian dibangunkan untuk pengurusan subsidi minyak yang diperkenalkan


syarikat itu sebelum ini.

“Menerusi sistem ini sejumlah wang bantuan akan disalurkan kepada akaun bank individu golongan yang memerlukan itu yang akan dihubungkan dengan MyKad bagi membolehkan mereka menggunakannya sebagai kad debit,” katanya kepada pemberita pada pelancaran program MyKasih di Selangor, semalam.

Pelancarannya disempurnakan Ketua Eksekutif Multimedia Development Corporation (MDeC), Datuk Badlisham Ghazali. Hadir sama, Ketua Pegawai Operasi ePetrol, Jeff Perera.

Sebanyak 25 keluarga sudah disenaraikan menerusi program perintis MyKasih yang dimulakan di Selangor Disember tahun lalu dengan bantuan RM10,000 sudah diagihkan menerusi program itu.

Program perintis MyKasih itu dibiayai Dialog Group Bhd dan dilancarkan dengan



BADLISHAM melihat seorang pelanggan Aminah Meor Mohamad membuat bayaran menggunakan MyKad di Stesen Caltex Selangor, semalam.

sokongan Chevron (M) Ltd dan stesen petrol Caltex, Selangor.

Bulan ini, 40 lagi keluarga akan dipilih menyertai MyKasih dengan bantuan badan bukan kerajaan (NGO) tempatan di sekitar Selangor.

Sementara itu, Badlisham

berkata, penggunaan MyKad menerusi program kebajikan MyKasih itu membuktikan satu lagi kemudahan dan keunikan ditawarkan MyKad.

“Malah, menggunakan MyKad untuk mengagihkan bantuan kebajikan adalah satu kaedah berkesan dan lebih selamat,” katanya.